

Kalaallit Nunaanni Eqqumiitsuliornermut Aningaasaateqarfik pillugu Namminersorlutik Oqartussat nalunaarutaat

Eqqumiitsuliornermik ingerlatsineq pillugu Inatsisartut inatsisaanni nr. 11, 6. juni 2016-imeersumi, kingullermik Inatsisartut inatsisaatigut nr. 25, 28. november 2019-imeersutigut aamma Inatsisartut inatsisaatigut nr. 33, 13 juni 2023-meersutigut allangortinneqartumi, § 16 a, imm. 2 aamma 3 naapertorlugit aalajangersarneqarpoq:

Kapitali 1

Siunertaq, atorneqarfissaa aamma suliassat

§ 1. Kalaallit Nunaanni Eqqumiitsuliornermut Aningaasaateqarfiup siunertaraa siuarsassallugit Kalaallit Nunaanni eqqumiitsuliornikkut ingerlatsineq, aamma kalaallit nunani allani eqqumiitsuliornikkut ingerlatsinerat, sapinngisamillu qularnaarniassallugu innuttaasut siamasissumik aamma tamatigoortumik kalaallit eqqumiitsuliaannik eqqumiitsuliornikkullu ingerlatsinerannik periarfissaqarnissaat, aamma eqqumiitsuliornikkut nunani allaneersunik periarfissaqartinneqarnissaat.

§ 2. Kalaallit Nunaanni Eqqumiitsuliornermut Aningaasaateqarfiup ingerlatsinerani ilaapput eqqumiitsuliornermik ingerlatsinerit tamakkiisut, Inatsisartut eqqumiitsuliornermut inatsisaanni ilaasut..

§ 3. Kalaallit Nunaanni Eqqumiitsuliornermut Aningaasaateqarfiup suliassaraa ataqqinaammik tunniuttakkanik tunniussinissaq ukunungalu tapiissuteqarnissaq:

- 1) eqqumiitsuliornermik ingerlatsinerup ingerlanneranut, tamatumunnga ilanngullugit angalanernut aningaasartuutit matussusernissaannut aamma ineqarnermut aningaasartuutitut,
- 2) eqqumiitsuliorluni suliat inerisarnerinut sularinerinullu, tamatumunnga ilanngullugit eqqumiitsuliornermik ingerlatsineranut atortussat aamma
- 3) eqqumiitsuliornermik ingerlatat saqqummersinnissaannut siammaannissaannullu.

Imm. 2. Suliassat allat suliassat isumaginerinut attuumassuteqartut, matumani ilanngullugit eqqumiitsuliornermik ingerlatsineq pillugu apeqqutini siunnersuineq aningaasaateqarfiup sularisinnaavai.

Imm. 3. Takussutissatut katersugaateqalernissaq inillu tamanit tikinneqartartut pinnarsarnissaat siunertaralugit kalaallit eqqumiitsuliaannik pisiortornissamut inniminniissamulluunniit tunngatillugu aningaasaateqarfiup naalakkersuisoqarfimmik siunnersuinissaa pillugu Kultureqarnermut Naalakkersuisoqarfik aningaasaateqarfimmik qinnuiginnissinnaavoq.

Kapitali 2

§ 4. Kalaallit Nunaanni Eqqumiitsuliornermut Aningaasaateqarfik siulersuisunit tallimanik ilaasortalimmit aqunneqarpoq.

Imm. 2. Siulersuisut ataatsimoorlutik eqqumiitsuliorneq, tapiissutinik aqutsineq pillugit ilisimasaqassapput kiisalu aningaasaqarnikkut, aqutsinikkut inuussutissarsiornikkullu piginnaaneqassallutik.

Imm. 3. Siulersuisut ataatsimut sinniisuuffigisassaanni ilaasortat ataasiakkaat tamarmik suliaasaqarfimmi arlariinniluunniit piginnaaneqartuussapput.

Imm. 4. Siulersuisuni ilaasortat aalajangersimasumik Kalaallit Nunaanni najugaqassapput.

§ 5. Kultureqarnermut Naalakkersuisoq siulersuisuni ilaasortanik ukiunut sisamanut atasussanik toqqaassaaq. Kattuffinnit aamma ingerlatsivinnit assigiinngitsunit inassuteqaateqartoqareerneratigut toqqaasoqassaaq, taakku tamarmik siulersuisuni ilaasortassamik ataatsimik inassuteqaateqassapput, kisiannili Eqqumiitsuliortut kattuffiat EPI siulersuisuni ilaasortassanik pingasunik inassuteqaateqassalluni:

1) Sulisitsisut.

2) Eqqumiitsuliortut kattuffiat EPI.

3) Katuaq.

Imm. 2. Siulersuisuni ilaasortat ataasiarlutik toqqaqqinneqarsinnaapput.

Imm. 3. Siulersuisut inissitsiternerminni siulittaasoq siulittaasullu tullia toqqassavaat.

§ 6. Siulersuisuni ilaasortap ataatsip toqqagaaffiup iluani tunuarneratigut, piffissap sinnerani siulersuisuni ilaasortaasussamik nutaamik Kultureqarnermut Naalakkersuisoq toqqaassaaq. Tamanna pissaq kattuffiup imaluunniit ingerlatsiviup inassuteqarsinnaatitaasup ilaasortaajunnaartumik toqqaasimasup inassuteqareerneratigut.

Imm. 2. Toqqagaaffiup iluani siulersuisuni ilaasortaq siulersuisutut akisussaaffimminik annertuumik sumiginnaasoq, allatulluunniit siulersuisutut sulinissaminut naapertuutinngitsumik iliuuseqartoq Kultureqarnermut Naalakkersuisup soraarsissinnaavaa.

§ 7. Siulersuisut aningaasaateqarfiup sulineranut pingaarnertigut najoqqutassanik aalajangersaassapput. Aningaasaateqarfiup atuunnermini ammasuunissaa paasiuminartuunissaalu siulersuisut qulakkiissavaat.

Imm. 2. Aningaasaateqarfiup sulinera pillugu Kultureqarnermut Naalakkersuisoqarfimmut ukiumoortumik siulersuisut nalunaarusiortassapput. Nalunaarut tamanut saqqummiunneqartassaaq.

Imm. 3. Ukiumoortumik nalunaarummi siulersuisut ukiumut tapiissutit nassuiartassavaat, uku malillugit:

1) eqqumiitsuliortut kinaassusii oqaatigineqartut sorliit ataqqinaammik tunniuttakkamik tunineqarnerisut,

2) eqqumiitsuliornermut sammisaq aalajangersimasooq, eqqumiitsuliortumut nersorinnissutaasoq,

3) eqqumiitsuliortup nersornaammik tunineqarneranut tunngaviusooq, aamma

4) aningaasat ataqqinaammik tunniussinnermi tunniunneqartut amerlassusaat tamakkiisoq.

Imm. 4. Ukiumoortumik nalunaarummi siulersuisut ukiumut tapiissutit nassuiassavaat, imatut agguanneqassalluni:

1) eqqumiitsulioriaatsit ataasiakkaat,

2) tapeeriaatsit ataasiakkaat,

3) pissarsisup najugaa, kommunikkaartumik naatsorsorlugu,

- 4) pissarsisup suaassusaa,
- 5) pissarsisup ukiui, ukiut akuttussusaat naleqquttut naatsorsorlugit,
- 6) nutaat siusinnerusukkullu aningaasaateqarfimmit tapiissutinik pissarsisut, aamma
- 7) nutaat siusinnerusukkullu aningaasaateqarfimmit tapiissutinik itigartinneqarsimasut.

Imm. 5. Tamatuma saniatigut aningaasaateqarfimmi aningaasaqarnermut sulisoqarnermullu pissutsit nalunaarummi nassuiarneqassapput.

§ 8. Siulersuisut namminneq suleriaasissartik Kultureqarnermut Naalakkersuisoqarfimmit akuerineqartussaq aalajangersassavaat.

Imm. 2. Suleriaatsimi malittarisassat ilaat makku ilaassapput:

- 1) Ataatsimiittarnerit,
- 2) taasinerlut malittarisassat,
- 3) attuumassuteqarpallaannginnissamut tunngasut,
- 4) nipangiussisussaataaneq,
- 5) ullut ataatsimiiffiusut amerlassusaat, kiisalu
- 6) imaqarniliortarneq.

§ 9. Kalaallit Nunaanni Eqqumiitsuliornermut Aningaasaateqarfiup siulersuisui sulinerminnut ukiumoortumik akissarsisarput. Siulittaasup akissarsiai 50.000 kr.-upput. Ilaasortat sinnerisa akissarsiaat 25.000 kr.-upput. Akissarsiat qaammatikkaartumik kingumoortumik tunniunneqartassapput, ukiumut aqqaneq-marloriarluni tunniunneqartassallutik.

Imm. 2. Siulersuisuni ilaasortaq qaammatip ingerlanerani ilaasortanngussappat siulersuisuni ilaasortap ullut atuuffi aallaavigalugit ullormut akissarsiaqassaaq, akissarsiat § 1-imi aningaasat amerlassusiisa taaneqartut 1/365-erutaannik. Taamatut assinganik atuuppoq siulersuisuni ilaasortaq qaammatip ingerlanerani ilaasortaajunnaarpat.

Imm. 3. Akissarsianut aningaasartuutit aningaasaateqarfiup akilissavai.

Aningaasartuutininik taartisiaqarneq

§ 10. Aningaasartuutit, taakkununga ilanngullugit angalanernut, nerisaqarnermut najugaqarnermullu aningaasartuutit, Kalaallit Nunaanni Eqqumiitsuliornermut Aningaasaateqarfiup sulinerani akilerneqartut Kalaallit Nunaanni Namminersorlutik Oqartussani tjenestemandinut malittarisassat qaqugukkulluunniit atuuttut naapertorlugit siulersuisuni ilaasortat aningaasartuutaanut taarsiissutaasassapput. Taakku aningaasaateqarfimmit akilerneqassapput.

Allattoqarfik

§ 11. Aningasaateqarfiup sulineranut allattoqarfeqarnikkut ikiuuttoqarnissaa sulisunik imaluunniit allatut iliorluni tassunga atorfinitsitsinikkut siulersuisut qulakkiissavaat.

Imm. 2. Atorfinitsitaanerni atugassarititaasut pissutsillu allat, atorfinitsinneqarnermi soraarsitsinernilu pissutsit eqqarsaatigalugit Kalaallit Nunaanni Eqqumiitsuliornermut Aningaasaateqarfiata pisussaaffigaa aalajangersakkat Namminersorlutik Oqartussani atorfeqartunut qaqugukkulluunniit atuuttut malissallugit.

Kapitali 3

Suliamik paasisimasallit

§ 12. Siulersuisut eqqumiitsulioriaatsinut tamanut suliamut paasisimasalimmik sinniisussamillu ataatsimik ukiuni marlunni atuuffeqartussanik toqqaassapput, ukunani:

- 1) Illussanik titartaaneq,
- 2) assilissanik eqqumiitsuliorneq,
- 3) filmiliorneq,
- 4) assassukkanik eqqumiitsuliat ilusilersuinerlu,
- 5) atuakkiorneq,
- 6) nipilersorneq, aamma
- 7) isiginnaartitsineq.

Imm. 2. Tamatumunnga suliamik paasisimasalik sinniisussaalu kalaallit eqqumiitsuliaannut aammalu suliamik paasisimasallip eqqumiitsulioriaatsimut aalajangersimasumut sammisaanut ilisimasaqangaatsiassapput.

Imm. 3. Suliamik paasisimasallit ataasiarlutik toqqaqqinneqarsinnaapput.

§ 13. Siulersuisut suliamik paasisimasallit ataatsimoorlutik inassuteqaataat tunngavigalugu aamma Ataqqinaammik tunissutisitsisarneq tunniuttakkallu isertitat naapertorlugit annertussusilerneqartarnissaat pillugit Namminersorlutik Oqartussat nalunaarutaat naapertorlugu ataqqinaammik tunniuttakkamik tunniussissapput.

Imm. 2. Suliamik paasisimasallit arfineq-marluusut ataatsimoorlutik nalilersussavaat, piukkunnaatillit kikkut ataqqinaammik tunniuttakkamik tunineqarsinnaanersut. Suliamik paasisimasallit arfineq-marluusut ataatsimoorlutik siulersuisunut inassuteqaasiussapput. Inassuteqaat piukkunnaatillit akornanni salliutitat tulleriaarneqarnerannik kiisalu piukkunneqartut tamarmik sooq inassutigineqarnerisut pillugu tunngavilersuummik imaqqassaaq. Suliamik paasisimasallit arfineq-marluusut akornanni isumaqatigiinngitsoqarpat, piukkussatut inassutigineqartut tamarmik taasissutigineqarnerisa agguataarneqarsimanerat allanneqassaaq.

Imm. 3. Suliamik paasisimasallit inassuteqaataannut siulersuisut pisussaaffeqanngillat.

§ 14. Siulersuisut suliamik paasisimasallit inassuteqaataat tunngavigalugu aamma Eqqumiitsuliornermik ingerlatineq tamatuminngalu ingerlatitseqqittarneq pillugit Namminersorlutik Oqartussat nalunaarutaat naapertorlugu tapiissuteqassapput.

Imm. 2. Suliamik paasisimasallit eqqumiitsulioriaatsimi ilisimasaminni tapiiffigineqarnissamik qinnuteqaatinik tiguneqartunik nalilersuissapput, tamannalu tunngavigalugu tapiissutinik tunniussinissaq, tassunga ilanngullugu tapiissutit suunissaat, angissusissaat piffissarlu killilik pillugit siulersuisunut inassuteqaasiussallutik.

Imm. 3. Suliamik paasisimasallit inassuteqaataannut siulersuisut pisussaaffeqanngillat.

§ 15. Suliamik paasisimasallit akornanni ataqatigiissaarinissaq siulersuisut qulakkiissavaat.

§ 16. Piffissami atuuffiusumi suliamik paasisimasalik tunuarpat, eqqumiitsulioriaatsimut pineqartumut sinniisussaq suliamik paasisimasallittut ilaasortanngusaaq. Matuma kingorna siulersuisut sinniisussamik nutaamik toqqaassapput.

Imm. 2. Piffissami atuuffiusumi sinniisooq tunuarpat siulersuisut sinniisussamik nutaamik toqqaassapput.

Imm. 3. Suliamik paasisimasalik pineqartoq ilatsiinnarpallaarpat imaluunniit suliap ingerlannissaanut allatut qanoq iliuuseqarnermigut imminut naleqqukkunnaarsimappat tamatumingga Siulersuisut soraarsitsisinnaapput.

§ 17. Suliamik paasisimasalik attuumassuteqarnermi imaluunniit sivisuumik napparsimanermi kinguneranik qinnuteqaammik suliarinnissinnaanngippat, eqqumiitsulioriaatsimi pineqartumi qinnuteqaat sinniisup suliarissavaa.

§ 18. Suliamik paasisimasallit sinniisuilu Kalaallit Nunaanni Eqqumiitsuliornermut Aningaasaateqarfimmit tapiiffigineqarnissamik qinnuteqaammik ataatsimik suliaqarnerit tamaasa akissarsisassapput.

Imm. 2. Tamatuma saniatigut suliamik paasisimasallit sinniisullu Kalaallit Nunaanni Eqqumiitsuliornermut Aningaasaateqarfimmit qinnuiginnittoqarneratigut, ataqqinaammik tunniuttakkanik tunniussinissamik inassuteqaasiornerit tamaasa akissarsiat imm.1-imi taanneqartumi akissarsisassapput. Akissarsiasat annertussusissaat Eqqumiitsuliornermut Aningaasaateqarfimmi siulersuisunit aalajangerneqassapput.

Imm. 3. Suliamit paasisimasalinnut sinniisuinullu akissarsiaannut aningaasartuutit Eqqumiitsuliornermut Aningaasaateqarfimmit akilerneqassapput.

Kapitali 4

Aningaasaliineq, missingersuut, naatsorsuutit kukkunersiuinerlu

§ 19. Eqqumiitsuliornermut Aningaasaateqarfiup sulinera Nunatta Karsiata ukiut tamaasa tapiissuteqarneratigut aningaasalersorneqassaaq.

Imm. 2. Eqqumiitsuliornermut Aningaasaateqarfik kingornussanit tunissutisianilluunniit isertitanik pissarsiaqarsinnaavoq.

Imm. 3. Eqqumiitsuliornermut Aningaasaateqarfik avataaniit tapiissutinik qinnuteqarsinnaavoq.

§ 20. Kalaallit Nunaanni Eqqumiitsuliornermut Aningaasaateqarfimmi siulittaasut ukiumut aningaasanut inatsiseqarfiusumut tullermut Kultureqarnermut Naalakkersuisoqarfimmit piffissalernerneqartumik missingersuutitut siunnersuummik ukiut tamaasa Kultureqarnermut Naalakkersuisumut tunniussaartassapput.

Imm. 2. Siunnersuummut imm. 1 malillugu ilaassapput isertitassatut aningaasartuutissatullu ilimagisaasut missingersuusiorderi. Ilutigisaanik siulersuisut Nunatta karsiata ukiumi aningaasaliiffiusumi tullermi tapiissutaasa annertussusissaattut siunnersuut saqqummiutissavaat.

§ 21. Kalaallit Nunaanni Eqqumiitsuliornermut Aningaasaateqarfiup ukioq naatsorsuusiorderia tassaavoq ukioq aningaasanut inatsiliorfik.

Imm. 2. Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaat naapertorlugu Kalaallit Nunaanni Namminersorlutik Oqartussat missingersuutit, naatsorsuuserineq naatsorsuutinillu saqqummiineq pillugit malittarisassai qaqugukkulluunniit atuuttut Eqqumiitsuliornermut Aningaasaateqarfiup malissavai.

§ 22. Ukiumoortumik naatsorsuutit Kalaallit Nunaanni Namminersorlutik Oqartussat kukkunersuiisoqarfiannit kukkunersiorneqassapput.

Imm. 2. Piffissaliussaq Kultureqarnermut Naalakkersuisoqarfimmit aalajangerneqartoq tikitsinnagu, ukiumoortumik naatsorsuutit kukkunersiorneqarsimasut siulersuisunit akuerineqarsimasut kukkunersuiisut

oqaaseqaataannik ilaqartillugit, siulersuisunit Kultureqarnermut Naalakkersuisoqarfimmut akuersissutigisassatut saqqummiunneqartassapput. Kultureqarnermut Naalakkersuisup ukiumoortumik naatsorsuutit tamatuma kingorna Inatsisartunut ilisimatitsissutitut ingerlateqqissavai.

Imm. 3. Kultureqarnermut Naalakkersuisumit naatsorsuutit akuerineqarsimasut siulersuisunit tamanut saqqummiunneqassapput.

Kapitali 5

Atuutilersitsinermut atorunnaarsitsinermullu aalajangersakkat

§ 23. Nalunaarut una atuutilerpoq ulloq 1. november 2024.

Imm. 2. Peqatigitillugu Kalaallit Nunaanni Eqqumiitsuliornermut Aningaasaateqarfik pillugu Namminersorlutik Oqartussat nalunaarutaat nr. 43, 13. august 2021-meersoq atorunnaarpoq.

Namminersorlutik Oqartussat, ulloq 29. oktober 2024

Aqqaluaq B. Egede (atsior.)

Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq

/ Nuka Kleemann (atsior.)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

